

毗婆尸佛經

宋朝散大夫試鴻臚卿明教大師法天奉 詔譯



清刻龍藏佛說法變相圖

毗婆尸佛經卷上上下同卷

盡九

宋朝散大夫試鴻臚卿明教大師法天奉詔譯

爾時佛告諸苾芻於過去劫有大國王名滿
 度摩有一太子名毗婆尸久處深宮思欲出
 遊告御車人瑜誡言與我如法安置車馬今
 欲出外遊觀園林瑜誡聞已即往廐中安置
 車馬控太子前乘之出外見一病人太子曰
 云何此人顏貌羸瘦氣力劣弱瑜誡答言此
 是病人太子曰云何名病瑜誡答言四大假
 合虛幻不實稍乖保調即生苦惱此名為病
 太子曰我能免不瑜誡答言俱同幻體四大
 無別如失保調亦不能免太子聞之情思不
 悅即迴車馬却至王宮端坐思惟病苦之法
 真實不虛心無安隱爾時世尊而說頌曰
 毗婆尸太子 遊觀於園林 忽見病患者

形色而憔悴 即問御車人 太子亦難免
端坐自思惟 病苦而無謬

爾時世尊說此偈已告苾芻言時滿度摩王
即問瑜譏云何太子出迴不悅瑜譏答言太
子出外遊觀園林見一病人形色瘦惡心神
不安太子不識問言何人瑜譏答言此是病
人又復問言我能免不瑜譏答言俱同幻體
四大無別如失保調亦不能免太子聞已即
迴車歸當思惟病法是故不樂時滿度摩王
聞是事已憶念往日相師之言若得在家即
紹灌頂輪王之位若或出家信樂修行而成
佛果如是念已即於宮內施設種種上妙五
欲娛樂太子令彼愛著斷出家意爾時世尊
而說頌曰

滿度摩父王 知子遊觀迴 身心而不樂

恐彼求出家 即以上妙樂 色聲香味觸
悅於太子情 今後紹王位

爾時世尊說此偈已告苾芻言時毗婆尸太
子告瑜譏言與我如法安置車馬今出城外
遊觀園林瑜譏聞已即往廐中安置車馬控

卷九

二

太子前乘之出城見一老人鬚髮皓白身心
味劣執杖前行呻吟無力太子曰此是何人
瑜譏答言此是老人太子曰云何名老瑜譏
答言五蘊幻身四相遷變始自嬰兒童子不
覺長盛老年眼暗耳聾身心衰朽名之爲老
太子曰吾免此不瑜譏答言貴賤雖異幻體
無別日往月來亦須衰老太子聞之不樂而
歸入定思惟老苦之法無能免者爾時世尊
而說頌曰

毗婆尸太子 忽見一老人 鬚髮皆皓然

執杖乏氣力 入定審思惟 一切有爲法
剎那而不住 無有免斯者

爾時世尊說此偈已告苾芻言滿度摩王見
太子不樂問瑜譏言我子云何情不樂耶瑜
譏答言太子出外見一老人太子曰此是何

人瑜譏答言此是老人太子又問云何名老
瑜譏答言五蘊幻身四相遷變始自嬰兒童
子不覺長盛老年眼暗耳聾身心衰朽名之
爲老太子曰我還免不瑜譏答言貴賤雖異
幻體無別日往月來亦須衰老太子聞已不

卷九

三

樂而歸入定思惟實無免者所以不悅王聞
是事憶念往昔相師之言若得在家必作輪
王若也出家必成佛果爾時滿度摩王如是
念已復以五欲妙樂娛悅太子令彼愛著斷
出家意爾時世尊而說頌曰

滿度摩父王 見子心不悅 憶昔相師言
恐彼求出家 即以妙五欲 種種悅其心
如彼天帝釋 受樂歡喜園

爾時世尊說此偈已告苾芻言時毗婆尸太
子告瑜譏言與我如法安置車馬今欲出外
遊觀園林瑜譏聞已即往廐中安置車馬控
太子前乘之出外見有多人圍繞車輿舉聲
大哭太子曰此是何人瑜譏答言此是死相
太子曰云何名死瑜譏答言人生浮世壽有
短長一旦乖離氣絕神逝求別恩愛長處荒
郊眷屬悲啼此名爲死太子曰我能免不瑜
譏答言三界無安未逃生死太子之身亦不
可免太子聞已身心不悅迴車歸宮入定思
惟無常之法不可愛樂我今云何得免斯苦
爾時世尊而說頌曰

毗婆尸太子 見彼命終人 即問御車者
無能免斯苦 獨坐自思惟 真實而不謬
我身復云何 得免無常患

爾時世尊說此偈已告苾芻言滿度摩王問
瑜譏言太子云何而不樂耶瑜譏答言太子
出城見一死人問言此是何人瑜譏答言此
是死相太子曰云何名死瑜譏答言人生浮
世壽有短長一旦乖離氣絕神逝求別恩愛
長處荒郊眷屬悲啼名之爲死太子曰我能
免不瑜譏答言三界無安未逃生死不可免
也太子聞已迴車歸宮入定思惟實無免者
是以不樂王聞是事憶念昔日相師之言若
得在家必作輪王若是出家必成佛果復以
五欲之樂娛悅太子令彼樂著捨出家意爾
時世尊而說偈言

滿度摩國王 毗婆尸太子 見彼命終人
咨嗟而不悅 王以上妙樂 色聲香等境
娛悅令愛著 捨離出家意

爾時世尊說此偈已告苾芻言時毗婆尸太
子告瑜譏言與我如法安置車馬今欲出外
遊觀園林瑜譏聞已即往廐中安置車馬控
太子前乘之出外見一苾芻剃除鬚髮身被
袈裟太子曰此是何人瑜譏答言此是出家
人太子曰云何名出家人瑜譏答言悟老病
死入解脫門行忍辱慈悲求涅槃安樂求別
親愛願作沙門名出家人太子聞已歡喜至
前善哉善哉行慈悲忍辱平等善法能背塵
勞趣求安樂我亦願爲言已歸宮即發信心
行出家法作沙門相爾時世尊而說頌曰
太子出王城 遊觀諸園苑 忽見老病人

及彼無常者 念念不久停 恒受種種苦
復覩出家人 剃除於鬚髮 服壞色袈裟
進止身儀雅 常行平等慈 忍辱諸善法
是故求出家 棄捨五欲樂 父母并眷屬
國城諸珍寶 即作沙門相 忍辱自調伏
息除貪愛心 勤求解脫樂

爾時世尊說此偈已告苾芻言滿度摩城八
萬人衆見毗婆尸捨父王位出家剃髮爲沙
門相而各思惟太子上族棄捨五欲而修梵
行我等今者宜亦出家彼八萬人如是思已
即時出家爲沙門身爾時世尊而說頌曰
大智最上人 其數有八萬 隨順毗婆尸
出家修梵行

爾時世尊說此偈已告苾芻言時毗婆尸菩
薩既出家已與彼八萬人離自國城遊行諸

處至一聚落結夏安居過是夏已而自思惟
我今云何如迷醉人遊行諸處作是念已心
得清淨至本住舍於夜分中復自思惟我今
何用世間富貴衆生受著輪迴生死苦蘊相
續無有窮盡又復思惟此老死苦因何緣所
生而得老死入三摩地諦觀此法從生支有
又復思惟此生苦因何緣所生入三摩地諦
觀此法從有支有又復思惟此有苦因何緣
所生入三摩地諦觀此法從取支有又復思
惟此取苦因何緣所生入三摩地諦觀此法
從愛支有又復思惟此愛苦因何緣所生入
三摩地諦觀此法從受支有又復思惟此受
苦因何緣所生入三摩地諦觀此法從觸支
有又復思惟此觸苦因何緣所生入三摩地
諦觀此法從六入支有又復思惟此六入苦

因何緣所生入三摩地諦觀此法從名色支有又復思惟此名色苦因何緣所生入三摩地諦觀此法從識支有又復思惟此識苦因何緣所生入三摩地諦觀此法從行支有又復思惟此行苦因何緣所生入三摩地諦觀此法從無明支有如是無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱如是集成一大苦蘊爾時毗婆尸菩薩又復思惟此老死苦因云何得滅入三摩地諦觀此法生滅則老死滅又復思惟此生苦因云何得滅入三摩地諦觀此法有滅則生滅又復思惟此有苦因云何得滅入三摩地諦觀此法取滅則有滅又復思惟此取苦因云何得滅入三摩地諦觀此法愛滅則取滅又

復思惟此愛苦因云何得滅入三摩地諦觀此法受滅則愛滅又復思惟此受苦因云何得滅入三摩地諦觀此法觸滅則受滅又復思惟此觸苦因云何得滅入三摩地諦觀此法六入滅則觸滅又復思惟六入苦因云何得滅入三摩地諦觀此法名色滅則六入滅又復思惟名色苦因云何得滅入三摩地諦觀此法識滅則名色滅又復思惟此識苦因云何得滅入三摩地諦觀此法行滅則識滅又復思惟此行苦因云何得滅入三摩地諦觀此法無明滅則行滅如是無明滅則行滅行滅則識滅識滅則名色滅名色滅則六入滅六入滅則觸滅觸滅則受滅受滅則愛滅愛滅則取滅取滅則有滅有滅則生滅生滅則老死憂悲苦惱滅如是一苦蘊而自不

生爾時世尊而說頌曰

毗婆尸菩薩 思惟老死苦 以智推彼因
何緣何法生 入定審諦觀 知從生支起
乃至行苦因 知從無明有 復觀從何滅
無明滅行滅 乃至老死盡 苦蘊悉皆無
爾時世尊說此偈已告苾芻言時毗婆尸菩
薩復觀色受想行識生滅不住如幻如化無
有真實智觀現前業習煩惱一切不生得大
解脫成正等覺爾時世尊而說頌曰

毗婆尸菩薩 復觀蘊等法 入彼三摩地
智觀現前時 惑苦業習氣 一切皆不生
如飄兜羅綿 剎那不可住 成就佛菩提
涅槃吉祥果 如月大圓明 光徧十方界
爾時世尊說此偈已告苾芻言時毗婆尸先
在因位一疑自身猶如迷醉二疑貪等煩惱

展轉增多如是思惟緣生之法得大解脫爾
時世尊而說頌曰

彼佛如來身 難成能得成 觀察緣生法
復斷貪瞋癡 究竟於彼岸 成就大解脫
如日在山頂 徧照於一切

卷九

八

毗婆尸佛經卷上

毗婆尸佛經卷下

宋朝散大夫試鴻臚卿明教大師法天奉 詔譯

爾時世尊說此偈已告苾芻言時毗婆尸佛
既成道已即作是念我於何處先應說法利
益有情諦觀思惟滿度摩王所都大城人民
熾盛機緣純熟作是念已即從座起整衣服
手執應器次第行乞往滿度摩城詣安樂鹿
野園中暫住止息自在無畏爾時世尊而說
偈曰

二足正徧知 自在行持鉢 安住鹿野園

無畏如師子

爾時世尊說此偈已告苾芻言時毗婆尸佛
告守門人曰與我往欠拏太子及近臣帝
嚕處吾今現在安樂鹿野園中我欲相見時
守門者聞是語已即詣欠拏太子及近臣帝

九

九

嚕處具陳上事毗婆尸佛成正覺道往滿
度摩城安樂鹿野園中我欲相見欠拏太子
聞是語已與帝嚕即乘車騎出滿度摩城
往安樂鹿野園中詣毗婆尸佛前頭面禮足
瞻仰尊顏目不暫捨爾時毗婆尸佛欲令欠
拏歡喜信受開示妙法佛言如過去諸佛所
說若布施持戒精進修行能離欲色煩惱過
失得生淨天時欠拏太子帝嚕聞是語已
心得清淨如毗婆尸正等覺心生正解心不
疑心善心軟心廣心無礙心無邊心清淨心
復爲宣說苦集滅道四諦法行種種開示時
欠拏太子帝嚕通達四諦見法知法得法
堅牢法依法住法不動法不捨法不空法譬
如白氎無諸塵垢悟法之心亦復如是爾時
欠拏太子帝嚕嚕白毗婆尸佛言如來應正

等覺我願出家受善逝戒佛言善哉今正是時即與剃髮受具足戒如是彼佛爲彼二人現三種神通令發精進趣向佛慧一現變化神通二現說法神通三現調伏神通如是現已欠拏太子帝蘇嚕勇猛精進經須臾間真智相應斷盡諸漏成阿羅漢爾時世尊而說頌曰

毗婆尸世尊 說法鹿野園 欠拏帝蘇嚕
俱來至佛所 即以頭面禮 瞻仰而一心
開示施戒門 苦集滅道法 聞已深信受
了達無生滅 俱求於出家 即受善逝戒
復覩神通力 速發精進心 須臾諸漏盡
成就阿羅漢
爾時世尊說此偈已告苾芻言汝今諦聽滿
度摩城人民熾盛宿植善本有八萬人聞欠

拏太子帝蘇嚕正信出家佛爲說法現通而成聖果如是思惟有如是出家如是梵行如是說法如是調伏世所希有得未曾聞我等今者亦願出家作是念已時八萬人俱捨家緣出滿度摩城往安樂鹿野園毗婆尸佛所頭面禮足却住一面合掌瞻仰目不暫捨佛爲說法令生信心佛言如過去諸佛所說妙法若人布施持戒精進修行能離欲色煩惱種種過失得生淨天時八萬人聞是語已心得清淨如毗婆尸佛正等覺心生正解心無疑心軟心善心廣心無礙心無邊心清淨心復爲宣說苦集滅道四諦法行種種開示彼八萬人通達四諦見法知法得法堅牢法依法不壞法住法不動法不捨法不空法譬如白氎離諸塵垢彼等之心亦復如是時八萬

人俱發聲言如來應正等覺攝受我等今得
出家受善逝戒佛即攝受剃髮受戒復為彼
衆現三神通令發精進一變化神通二說法
神通三調伏神通如是現已時八萬人勇猛
精進不久之間漏盡意解成阿羅漢爾時世
尊而說頌曰

重九

十一

滿度摩城內 衆有八萬人 聞於欠拏等
出家成聖道 俱發清淨心 而來詣佛所
聞法心歡喜 速起勇猛心 合掌白世尊
願聽我出家 受持於戒律 應時為攝受
剃髮而受戒 復為現神通 斷盡諸結縛
如滅尸利林 熾焰永不生 成就大解脫
如是衆苦依 當得滅無有
爾時世尊說此偈已告苾芻言毗婆尸佛度
彼衆已出安樂鹿野園往滿度摩城八萬苾

芻亦往滿度摩城詣世尊前頭面禮足於一
面坐佛即具說得道因緣令其堅固爾時世
尊而說頌曰

難作極難作 輪迴盡輪迴 如是八萬人
求斷衆結縛 亦如帝釋嚕 欠拏太子仙
精進求出家 俱獲解脫果

爾時世尊說此偈已告苾芻言時毗婆尸佛
而作是念此大苾芻衆住滿度摩城宜應減
少令六萬二千苾芻往詣諸方遊行聚落隨
意修習經六年後歸滿度摩城受持波羅提
目叉作是念時於虛空中有一天子知佛心
念告毗婆尸佛言善哉若令六萬二千苾芻
遊諸聚落隨意修行經六年後復還本國受
持波羅提目叉今正是時佛即告言汝苾芻
衆中令六萬二千人遊諸聚落隨意修行經

六年後復還本國受持波羅提目叉時六萬
二千人聞是語已出滿度摩城隨方遊止爾
時世尊而說頌曰

無漏無等等 調御大丈夫 導引於群生

令至寂靜道 今遣苾芻衆 最上佛聲聞

六萬二千衆 出彼滿度城 遊行諸聚落

如龍大威勢 隨意自修行 六年復本國

爾時世尊說此偈已告苾芻言彼六萬二千

人即時出城往諸聚落隨意修行如是過一

年二年至第六年彼諸苾芻互相告言六年

已滿宜歸本國作是語時空中天人復告言

曰今正是時歸滿度摩城受持波羅提目叉

於是六萬二千苾芻以自神力及天威德經

須臾間至滿度摩城爾時世尊而說頌曰

彼佛大苾芻 六萬二千衆 遊諸聚落中

隨意六年滿 自思欲往還 天人普告示

令歸滿度城 受持清涼戒 聞之大忻慶

身毛皆喜豎 即運神通力 如乘大龍象

須臾還本城 自在無所礙 無上二足尊

出生於世間 善說衆律儀 度脫諸群品

今當爲敷演 波羅提目叉

爾時世尊說此偈已告苾芻言彼六萬二千

人至滿度摩城詣毗婆尸佛前頭面禮足却

坐一面佛言諦聽我今演說波羅提目叉曰

忍辱最爲上 能忍得涅槃 過去佛所說

出家作沙門 遠離於殺害 身口七支過

持此戒具足 發生大智慧 得佛清淨身

世間無有上 出生無漏智 盡苦苦生死

爾時世尊說此戒時復有諸天天子以天威

力來下天宮詣毗婆尸佛前作禮合掌聽受

波羅提目叉爾時世尊而說頌曰

無漏不思議 破暗到彼岸 釋梵一切天
俱聽大僊戒

爾時世尊說此偈已告苾芻言我於一時在
王舍城七葉巖邊住止淨室而忽思惟過去
毗婆尸佛說毗柰耶藏時恐有諸天不來聽
受大僊戒者今往諸天問諸梵衆作是念已
我於彼時入三摩地如大力士展臂之間至
善現天彼之天子頭面禮足而作是言善哉
世尊久不來此我是毗婆尸佛正等正覺聲
聞弟子彼佛姓刹帝利信心出家憍陳族壽
八萬歲父名滿度摩王母名滿度摩帝欠拏
太子帝蘇嚕出家受戒成阿羅漢大賢第一
侍者名阿輸迦三會說法廣度聲聞第一大
會六萬二千人得阿羅漢第二大會十萬人

得阿羅漢第三大會八萬人得阿羅漢毗婆
尸佛有如是最上如是出家如是證菩提如
是說法如是調伏令諸弟子著衣持鉢修諸
梵行遠離五欲斷煩惱得解脫證無生法成
阿那含復次尸棄佛毗舍浮佛拘留孫佛拘
那含牟尼佛迦葉佛說法調伏著衣持鉢修
諸梵行遠離五欲斷煩惱證無生法成阿那
含亦復如是爾時世尊有無數百千天子恭
敬圍繞往善見天彼天見佛頭面禮足與無
數百千天子恭敬圍繞往色究竟天時彼天
王遙見世尊五體投地禮世尊足而作是言
善哉世尊久不來此我是毗婆尸佛正等正
覺聲聞弟子彼佛姓刹帝利憍陳族壽八萬
歲父名滿度摩王母名滿度摩帝城亦名滿
度摩欠拏太子帝蘇嚕出家受戒成阿羅漢

大賢第一侍者名阿輸迦三會說法廣度聲聞第一大會度六萬二千人得阿羅漢第二大會度十萬人得阿羅漢第三大會度八萬人得阿羅漢毗婆尸佛有如是最上如是出家如是梵行如是證菩提如是說法如是調伏令諸弟子著衣持鉢修諸梵行遠離五欲斷煩惱證無生法成阿那含復次尸棄佛毗舍浮佛拘留孫佛拘那含牟尼佛迦葉佛如是著衣持鉢說法調伏修諸梵行遠離五欲證無生法成阿那含今大牟尼說法梵行調伏衆生亦復如是爾時天子而說頌曰

無上二足尊 而入三摩地 速運大神通 離彼閻浮界 來至善現天 譬如大力士 速展於手臂 剎那到此間 世間甚希有 無漏無障礙 清淨解脫身 如蓮不著水

卷九

十五

百千世界中 無與佛齊等 降伏大魔土 如河漂細草 善現等諸天 俱來頭面禮 歸命最上尊 正覺大慈悲 調伏諸衆生 六根皆清淨 出生無上慧 依法精進行 過去毗婆尸 正等正覺尊 所宣微妙法 三會度聲聞 律儀及梵行 守護無缺犯 清淨而圓滿 如夜十五日 尸棄佛世尊 毗舍浮如來 賢劫拘留孫 拘那含牟尼 及彼迦葉佛 如是諸如來 所度聲聞衆 皆已得漏盡 無復諸煩惱 恒修七覺支 及行八正等 能離五欲過 通達大智慧 衆所皆知識 如彼毗沙門 常服甘露味 如王得灌頂 永破諸暗冥 如日放光明 一一佛世尊 威儀及法行 利益諸群生 種種開方便 引導無有異

爾時世尊說此偈已告苾芻言我往彼天聞
是事已知諸天人諸佛法會皆來隨喜若復
有人愛樂受持行住坐卧思惟讀誦無諸迷
惑永斷輪迴解脫安樂佛說此經已皆大歡
喜信受奉行

毗婆尸佛經卷下

書

二八